
Gramàtica bàsica i d'ús de la Llengua Catalana. Barcelona. Institut d'Estudis Catalans, 2019

Col asoleyamientu de la *Gramàtica bàsica i d'ús de la llengua catalana* (GBU) en 2019, l'Institut d'Estudis Catalans (IEC) completa la publicació del so conxuntu de gramàtiques institucionales. Asina, espublizaba en payares de 2016 la so *Gramàtica de la llengua catalana* (GIEC), la nueva gramàtica normativa del catalán y que supunxo una actualización fonda al respetive de la gramàtica normativa anterior (la *Gramàtica catalana* de Pompeu Fabra, del añu 1918). Darréu d'ello, dientro del llabor planificáu d'apurir ferramientes de trabayu y de consulta de la llengua catalana, l'IEC desendolcó nel 2018 la *Gramàtica essencial de la llengua catalana* (GEIEC) –dende esa gramàtica normativa–, preséu *on line* que facilita les consultes sobre duldes existentes de mou immediatu y adaptada a usuarios con una conocencia gramatical xeneral, ensin necesidá d'una formación llingüística fonda.

Ye a partir d'esa GEIEC de la que surde –y cola que se complementa– la *Gramàtica bàsica i d'ús de la llengua catalana* (GBU), una versión acurtiada de la *Gramática*, baxo la direición de Maria Josep Cuenca, miembru de la comisión de Gramática de la Seición Filolóxica del IEC y caderalga de Filoloxía Catalana na Universidá de Valencia.

La *Gramàtica Bàsica i d'ús* (GBU) ye una gramática en papel de 578 páxines (de les que 17 páxines son introductories y otres 24 páxines son d'índices). Esta obra va empobinada tal como se diz na «Presentación» «al públicu non especializao y mui específicamente al mundu de l'Alministración, de los medios de comunicación y del enseñu como obra de consulta que pue orientar na interpretación y l'aplicación de la normativa del IEC» (p. IX). En comparanza cola gramática normativa ye una tercer parte del llargor d'esta, lo qu'implica un llabor claru de resume y de síntesis de la información contenida na GIEC.

La GBU compónse de cuarenta capítulos curtios. Caún d'ellos vien encabezáu por un sumariu y darréu d'él, dellos apartaos, un glosariu y, dacuando, anexos. La estructura de los apartaos ígüase en dos partes: *a)* descriptiva y *b)* les notes o esplicaciones concretes, les «Remarques normatives i d'ús». Dientro d'estes característiques destacables, acordies col so papel divulgativu y pensada pa un públicu ampliu, ta esi pequeñu glosariu que vien a lo cabero de caún de los capítulos. Esti glosariu organízase en definición, exemplos y remisión, tal que como obra remanecida d'esta, al apartáu correspondiente de la gramática *on line* (GIEC). Xunto a ello, abondos exemplos que se disponen, bien dientro de los cuadros –na esplicación o nes notes–, bien dientro del testu, o bien espuestos en tabla pa facer comparanza d'exemplos, faciliten la comprensión.

Otru aspectu destacable son los 170 cuadros resume y les catorce figures –dedicaes básicamente a los contornos entonativos–, lo que fai más fácil la busca y comprensión d'información gramatical básica y concreta. A ello hai



d'amestar los 271 ficheros de soníu accesibles per códigu QR que dexen escuchar los exemplos de los cuadros de les vocales y a les consonantes, lo mesmo que los exemplos de les figures relatives a los contornos entonativos. Como vemos ye una gramática orientada a la facilidá d'usu y al accesu rápidu de la información, de la consulta precisa per parte del usuariu nesi momentu.

La *Gramàtica Bàsica i d'Ús* (GBU), versión resumida de la gramática normativa, céntrase na parte de la normativa qu'afecta a los rexistros formales y como yá diximos ye una gramática qu'orienta l'emplegu d'esos usos formales nos medios de comunicación, l'Alministración y la escuela, en contraposición a los rexistros informales y que dexa cuasi siempre fuera la llingua coloquial. D'esta miente, como yá se fai dende la GIEC nel 2016, la GBU desancia l'emplegu de la dicotomía *correuto/incorreuto*. Nesta gramática normativa atiéndese a les diferencies ente usu *oral* y *escritu*, ente lo xeneral y lo especializao y, sobre manera, a tres niveles o rexistros determinaos de formalidá: *performales*, *formales* ya *informales*. Pon tamién atención sobre fenómenos o elementos consideraos coloquiales si tán rellacionaos con dalgún de los anteriores. Pa cabu taríen los elementos que queden fuera de la norma, aquellos que se consideren *non aceutables*. Entiéndese que lo acionao, lo adecuao o inadecuao d'un elementu de la gramática, nun depende de sí mesmu sinón que tien de tar en rellación col rexistru (performal/formal/informal o coloquial) y la variedá diatópica, y asina apaecen tres marques normativas a la hora de tratalo: *nun ye aceutable*, *evítese* y *ye preferible*. Como vemos esta formulación supunxo un cambéu fondu en cómo se ven los fechos llingüísticos y n'especial cómo s'entiende la norma.

Agora bien, la exa central de la GBU ye facilitar y simplificar la consulta inmediata a un públicu concreto, que nun tien que por qué tener conocencia llingüística fonda, polo que toa esta información que se ve na *Gramàtica* del Institut d'Estudis Catalans tien que se facer más cenciella y acurtiada. Equí, nesti procesu de simplificación puen perdese dellos d'esos matices de la nueva norma gramatical al centrarse na *formalidá*, tal como se fai nes gramátiques de calter normativu y prescriptivu tradicional. Esa simplificación quiciabes nun recueya l'espectru tan ampliu de situaciones de comunicación y discursives que podemos tener güei nos ámbitos a los que se diz empobinar la GBU (medios de comunicación, Alministración, enseñu) y al recoyer namái aquello que ye formal dexa de llau rexistros informales, escritos y orales, que puen apaecer y apaecen, sobre manera, na escuela o nos medios de comunicación.

Hai, per otru llau, daqué que llama fundamente l'atención nesta *Gramàtica Bàsica i d'ús* y ye que, tal que se diz na «Presentación» d'esta, dásenos anuncia de qu'hai «informaciones d'usu diverses, que nun apaecen na GIEC y dacuando tampoco na GEIEC» (p. X). Esta ye una cuestión que produz, cuanto menos estrañeza y camientu que tendríen que s'especificar esos anovamientos y/o camudamientos al respetive de la *Gramàtica* de dalgún mou y en dalgún llugar.

Ye asina esta *Gramàtica Bàsica y d'Ús* (GBU) la obra que completa'l



conjuntiu de gramàtiques del IEC y que vien a cubrir les necessitats de consulta, interpretació y/o aplicació de la normativa acadèmica del catalán d'un públicu que se considera non especializao –de mou especial del mundu de l'Alministración, de los medios de comunicació y del enseñu– que busca respuestes rápides. Precisamente esti calter básicu y d'usu lleva a la simplificació de la gramática normativa, colo que pierde aspectos y matices de los rexistros non formales de la llingua –el catalán nesti casu– non consideraos nesta gramática básica. Sicasí, estes oxecciones feches nes ringleres anteriores nun quiten un res de valir a esta obra y a les posibilidaes qu'ufierta [Héctor García Gil].

